



Nov guid d'architectura davart la chasa grischa

In onn suenter la renovaziun da la chasa grischa è cumparà in guid architectonic davart quest edifizii.

2



Di dal gaud dal Revier forestal Riom

La populaziun da Cunter, Riom-Parsonz e Salouf ha pudì prender invista da las funcziuns da lur gauds.

13

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuira, tel. 081 920 07 10, fax 081 920 07 15

Energia favuraivla in Engiadina Bassa

■ (anr/fa) Davo plüs ons da trattivas e cuntaisas s'han la CCC e las Ouvras electricas engiadinaisas (OEE) abinadas. Fin da l'on 2050 pajan ils cumüns concessionar predschs fich favuraivels. I'ls prossems ons s'incharischarà l'electricità sün tuot il muond marcantamaing. Ils cumüns concessionar da las OEE invezza varan da pagar i'ls prossems quaranta ons predschs d'energia uschè favuraivels sco

bod ninglur in Svizra. Quai es dvantà pussibel grazcha a la cunvegna tanter la Corporaziun dals cumüns concessionar (CCC) e las OEE. In quella esa fixà cha'ls 12 cumüns concessionar da S-chanf fin Tschlin hajan da pagar fin dal 2050, cur cha la concessiun scrouda, per l'energia ch'els retiran da las OEE be il predsch da produziun e na il predsch da marchà.

> PAGINA 9

Per la ventgavla giada en il Tircal

Dis da litteratura a Domat

DA CLAUDIA CADRUVI / ANR

■ Damaun avra il Tircal puspè sias portas per ils dis da litteratura. Per la ventgavla giada s'inscuntran a Domat lecturs ed amis da la cultura cun scripturs ed artists. Il program è main pulpi che auters onns. Entant ch'ins pudeva dumbrar uschiglio var ventg prelecziuns ed occurrenz, porschan ils dis da litteratura quest onn «sulet» in tozzel preschentaziuns. Tuttina resta la tscherna attractiva e plain variaziun. Per il public èsi grev da decider tge ch'ins duai ir a tadlar.

Il venderdi saira stat «Bern ist überall» sin il palc. I sa tracta d'ina gruppa d'auturs che fa acrobatica da plets u «spoken word». Tranter ils auturs sa chatta Arno Camenisch.

La sonda datti gist trais puncts culminants. La damaun ha lieu la vernissascha da «Catscha sil capricorn en Cavrein», il nov cudesch da Leo Tuor. Encunter saira vegnan prelegids ils tschintg texts dals concurrents per il Premi Term Bel. Tgi che va cun la plima, respectivamain cun il premi, vegn relatà pir la dumengia.



Gia per la 20avla giada han lieu la proxima fin d'emna ils Dis da litteratura a Domat.

FOTO J. MENOLFI

La sonda saira festiveschan ins lura l'anniversari dals dis da litteratura cun la «revue da giubileum», cun musica e saut.

Radund 500 persunas visitan mintgamai ils dis da litteratura, di Anita Simeon dal comité d'or-

ganisaziun. Ils sponsurs principals da quest event da trais dis èn l'Uniu da litteratura rumantscha, la Pro Helvetia ed il chantun. Il cumin da burgais da Domat finanziescha il Premi Term Bel. Flurin Spescha e Benedetto

Vigne avevan a sias uras inizià ils dis da litteratura ch'èn daventads en il decurs dals dus ultims decennis in punct fix en l'agenda culturala rumantscha.

> PUNTG DA VISTA PAGINA 2

Sustegn per dunnas en speranza

■ (anr/sr) Edith Caderas da Ruschein fa actualmein la scolaizon da doula – quei che munta ton sco survienta dalla dunna. Doulas prendan la tema a dunnas en speranza, accumpognan ils geniturs vegnents duront la nashientscha ed ein era suenter cheu per la famiglia. «Survegnir in affon ei il pli bi ch'ei dat ella veta – sco doula sai jeu esser ina part da

quella miracla», selegra la mumma da treis affons. Ella daventi aschidadir ina amitga fidada sin temps. «Miu pensum ei sulettamein d'esser cheu pil bab e la mumma sin basa emoziunala e psicologica, ina doula fa negina concorrenza alla spindrera e surpren neginas funcziuns medicinalas.»

> PAGINA 7



Edith Caderas da Ruschein ei l'emprema doula ella regiun.

MAD

Ir süls ots a palomber

■ (anr/mdp) Il Club da palomber San Murezzan exista daspö l'an 1969 ed ho circa 60 commembers. Tenor sia presidenta Claudia Kukraschewski sun la granda part dals commembers indigens u persunas chi sun gnidas da la Bassa per ster illa regiun. Scu cha la presidenta disch as tratta que pelpü da persunas chi haun impris a palomber i'l mer. «Chi chi vules dvanter commember

tar nus ho ubain dad avair las cugnuschentschas fundamentelas u da fer ün cuors introductiv cun elemaints da teoria e da la pratica», disch la medicinra Kukraschewski, «chi chi nu piglia serius las preparativas metta in priovel sia sandet.» Ella renda attent al grand sforz pel corp umaun suot ova.

> PAGINA 9

Co duein meriteivels vegnir honorai?

■ (anr/hh) Il parlament dalla Regiun Surselva sefatschenta proximamein era d'ina incumbensa dil parlamentari Jakob Cabernard davart ina regurdientscha durabla en honor dil skiunz Carlo Janka. La suprazonza propona al cussegl regiunal d'installar persunter ina gruppa da lavur. Quella duei sclarir da principi differentas damondas. Aschia duei vegnir sclariu co persunas cun gronds merets san vegnir undradas.

> PAGINA 3

Decisiun dispitevla a Marmorera

■ (lq) Sonda passada on igls 17 votants preschaints detg EA cun 10.5 agl Parc Ela. En EA fitg stgers cun 8.7 e dus abstenziuns e tgi caschungha discussiuns è er nia per igl project dalla veia tras Marmorera vischnanca e per igl credit lotiers da 2.5 milliuns francs. Chegl vot deir tgi la veia vign exequeida ainten la varianta «luxeriosa», scu tgi igls adversaris nomnan igl project e chegl gio la premeveira proxima.

> PAGINA 11

Affons el turmeagl dallas medias

Conferenza evangelica dalla Foppa e contuorn

■ (mc) Scolars e giuvenils vegnan confrontai oz cun ina gronda paletta da purschidas medias. Sper las medias tradiziunals sco gasettas, telefon, radio e televisiun survegnan la comunicaziun mobila ed igl internet adina dapli muntada per affons e carschi. Las medias acumpognan nus dalla tgi-

na alla fossa e lur posiziun ella veta da mintgadi ei centrala. Quei ensiara schanzas, denton era prighels ed ei per tuts ina sfida. La cumpetenza d'ir entuorn cun las medias crescha e dominescha oz buca mo la veta professionala, anzi era la veta privata. Alla conferenza evangelica dalla Foppa e contuorn ei quella te-

matica vegnida tractada en in referat dil pedagog da medias Thomas Merz che ha era dau tips pratics sco muossavia el consum da medias. Il suentermezdi ei la tematica vegnida discutada a moda approfondida en differents luvratoris.

> PAGINA 3



Il parsura dalla Conferenza evangelica dalla Foppa Jan Andrea Bernhard (dretg) ha envidau il pedagog da medias Thomas Merz sco referent.

FOTO M. CABALZAR